



JUDICIAL SYSTEM MONITORING PROGRAMME
PROGRAMA DE MONITORIZAÇÃO DO SISTEMA JUDICIAL

Komunikadu Imprensa

Periodu : Agostu 2010

Edisaun : 01 Setembru 2010

**JSMP Hala'ó Treinamentu Kódigu Penál Timór Léste bá Membrus Polísia Iha
Distritu Bobonaro**

Iha laron 26 Agostu 2010, JSMP liu husi Unidade Relasaun Públiku (Outreach) no Unidade Pesquisador Jurídika (LRU) hala'ó treinamentu konabá Kódigu Penál Timór Léste iha Distritu Bobonaro. Membru Polísia ne'ebé partisipa iha treinamentu Kódigu Penál Timór Léste ne'e hamutuk ema nain 20. Entre numeru ne'e, iha mane hamutuk nain 9 no fetu hamutuk nain 11 ne'ebé mai husi Ajente Polísia ne'ebé kompostu husi Representante Ajente Polisia husi Komandante Eskuadra Sub. Distritu no Komandante Sub. Distritu, Komandante VPU, Komandante Investigasaun Representante Komandante Distritu Bobonaro, inklui Ajente sira ne'ebé servisu iha area ne'ebé relasaun area investigasaun kriminal nian.

Luis de Oliveira Sampaio, Direitór JSMP haktuir katak, atividade treinamentu Kódigu Penál foun ne'e bá Timór-oan hotu no importante tebes bá Instituisaun Polísia PNTL tanbá hanesan instituisaun ne'ebé servisu atu garantia lei ho orden, persiza iha koñesementu kle'an konabá kna'ar servisu no obrigasaun ne'ebé sira hala'ó iha iha terenu báinhira hala'ó orden judisiariu, atu nune'é bele proteje sidadaun hotu-hotu nia direítu tuir lei. Liu-liu, atu Polísia sira atu hatene konabá prosedimentu kapturasaun, detensaun no atu lori Arguidu, Vítima no Testemuña bá iha prosesu primeiru interrogatóriu iha Tribunal dentru de peridu 72 oras nia laran.

Husi prosesu ne'e JSMP observa katak Polísia nia koñesementu konabá Kódigu Penál Timór Léste nian sei mínimu tebes. Tanbá ne'e JSMP hanoin katak sira persija duni iha aktividade hanesan ne'e, atu nune'é sira la bele lakon informasaun importante, no bele hatene liu tan konabá sira nia kna'ar ka reponsabilidade Polísia nian bainhira atua krimi ne'ebé mosu.

Atu hakle'an liu tan Polísia nia hanoin no atu enkoraza partisipasaun máximu husi Polísia sira, iha prosesu treinamentu ne'e uza maneira partisipativu hodi fo matéria hotu konabá Kódigu Penál Timór Léste nian. Signifika JSMP hato'ó matéria, Polísia sira bele husu dereitamente, karik iha buat ruma mak sira dúvida, preukupa, kestiona ka karik ladun komprende.

Maske iha sesaun ka tempu propoiu bá Polísia sira atu husu perguntas. Aleinde ne'e JSMP mós fahé partisipantes sira bá halo diskusaun iha grupu ki'ik nia laran, atu nune'é bele halo sira aktivu hodi fo sira nia hanoin no bele hare oinsá sira nia koñesementu konabá material ne'ebé JSMP hato'ó tiha ona.

Husi observasaun JSMP nian no opiniaun ne'ebé mai husi Polísia sira hatudu katak programa treinamentu importante tebes bá sira. Tanbá antes ne'e Polísia balun seidak hatene konabá materia ne'ebé JSMP hato'ó bá sira no oinsa atu bele inerpreta Kódigu ne'e rasik.

Ne'e duni, JSMP sei kontinua nafatin hala'ó treinamentu bá membru Polísia sira iha Distritu hotu, atu nune'é komesa agora no iha futuru, Polísia tomak iha koñesementu diak, konabá Lei Kódigu Penál Timór Léste ida ne'e.

Atu hetan informasaun kle'an favor kontaktu:

Luis de Oliveira Sampaio

Direitor Ezekutivu JSMP

Diresaun e-mail: luis@jsmp.minihub.org

Landline: 3323883